



S'Chlause-Puzzle

Wieder emol bin ich mit mim Schmutzli Sepp underwägs gsi. Es isch scho zimli spot gsi und mir händ no s'letschi Dorf a dem Abig well go bsueche. Mir händ gwüst, dass i dem Dorf unfründlich, hässigi und ifersüchtigi Lüüt läded. Will mir scho zimli müed gsi sind hämmer euis no echli welle usruebe.

Wo mir dänn, aber i das Dorf iechömed, häd uf em Dorfplatz es grosses Fүүr brännt, vill Lüüt sind ume gsi, wo mitenand gsunge, tanzed und glached händ. Wo sie euis gseh händ händs sofort en Stuel brocht zum Sitze und warme Tee zum Trinke. Ganz erstunt simmer gsi und ich han zu de Lüt gseit: «Das hät ich jetzt i dem Dorf überhaupt nöd erwartet!» Do händ Lüt lut glached und zwei Chind, d' Simone und de Martin händ grüeft «Mir sind schuld, dass es eso isch!»

Und d'Simone häd afo verzelle: «Einisch isch bi euis amene Morge im Briefchaschte es komisches rots Holzteili gsi mit eme Brief. I dem Brief häds gheisse: «Das Teili guet ufbewahre es bringt Glück!» Das hämmer natürli niemerem welle verzelle, häd d'Simone gseit. Mir händ gwartet und gwartet uf das Glück aber es isch nüd passiert. De Papi häd s'Teili scho welle fortrüere, aber ich has dänn im Zimmer versteckt.»

De Martin häd de witer verzellt:»Bi euis isch es genau glich gsi. Und einisch bim Spile hani s nümme usghalte und ich han de Simone euis Teili zeigt. De häd sie gseit, sie hebi au e sones Teili

dehei. Mer sind's grad go hole und die zwei händ zämepasst. Mer händ zerscht nöd rächt gwüst, was mer jetzt sölled mache. Aber es isch wahrschinli s'Bescht wämmer das euisse Eltere verzelled. Au sie händ gschtuned, wils nöd dänkt händ, dass no öpper ander au eso nes Teili hed. Do häd s'Mami vom Martin gseit: «Die zwei Teili sind jo no vill zwenig, gid's ächt no meh Teili i eusem Dorf?» D'Simone und de Martin händ die andere Chind gfroged, öpps ächt au eso nes Teili händ?

Dänn häd d'Simone witerverzellt: «Es händ nid alli welle säge, dass sie eso nes Teile übercho händ. Aber gli emol sind doch no e paar Teili füre cho. Mir händ's probiert zämesetze, aber händ bald gmerkt, dass do no Teili fehled. Mir sind de mit dene Teili wommer gha händ uf de Dorfplatz, dass alli ander Lüüt gmerkt händ, dass da öppis los isch. De Gwunder häd d'Lüt packt und uf eimal sind meh und meh Teili zum Vorschi cho. Plötzli isch das Zämesetzspili ufgange.

D'Simone und de Martin händ mir dänn zeiged was es gäh häd, nämli e bunti Schar Lüüt und Chind wo mitenand tünd lache, singe und tanze.

Wo mer das Zämesetzspili eso aglueged händ häd de Papi vo de Simone gseit. Weisch Samichlaus, womer mitenand versucht händ die Teili z'sämesetze do hämmer gmerkt, dass es eigentlich vill meh Freud und Spass macht mitenand öppis z'mache, statt immer nur für sich sälber z'luege.